

皇
清
奏
議

皇清奏議卷三十九

興修豫省水利疏

乾隆八年

碩色

巡撫河南等處地方提督軍務兼理河道督理營田都察院右副都御史臣碩色謹奏為分別興修水利仰祈
睿鑒事竊惟耕鑿為衣食之源水利為農田之本河道
疏通則民生攸賴浸溢無虞豫省歸德府屬之永城鹿邑
及陳州府屬之淮寧西華四縣或界聯江南居其下游或
地勢低窪素稱澤國以致頻年被水上厓 宸衷今夏

特遣大臣來豫賑恤各邑災黎方登衽席隨經

欽差侍郎臣紀山左都御史臣劉統勳查明各縣溝渠淤
塞並江省橫過水道不容下注情由 奏請查勘疏濬經
部議令會同江南督撫遴委幹員查勘開通奉 旨依
議速行移咨欽遵在案臣抵豫之後仰體我 皇上軫

念民瘼已饑已溺之至意即檢查案卷遍訪輿情推求永城等處受水之由稽考從前未能疏洩之故總因事關江豫兩省格礙難行今臣再四思維酌為分別疏通之法其錯壤江省者移咨會商其水道之在豫省者先為開濬如此庶可逐漸開通不致因噎廢食臣伏查永城一縣北與江南之碭山縣昆連東與江南之蕭縣宿州接壤其縣境北隅有洪溝河一道上接碭邑毛城鋪減下黃河之水下注宿州之睢河而歸洪澤此吐納減黃之正流也其上游碭蕭二縣境內又有支河二道一曰蔣溝河一曰巴河緣黃水盛漲洪溝一河不足以資宣洩故又開此二河以分水勢亦由蕭邑地界滙歸睢河此分瀉黃水之支派也昔年各河深通水不為患迨後蔣溝年久沙淤巴河蕭邑堵塞毛城減下之水盡歸洪溝不能容納以致黃水漫溢永

邑屢被水災又該縣城北另有巴溝一道綿長百里西接
廬城及邑之水東亦達於睢河因下游江南宿川境內翟
家橋地方中隔沙礮不能下洩水滯沙停溝身淤墊每遇
淫潦即四散旁淹附近民田頻年受害去歲今春節據永
邑詳請前撫臣雅爾圖移咨江省開濬臣抵任後即又查
卷咨催嗣准江省覆稱蔣溝河已經開浚巴河土壩現在
洪溝河尚可容受無庸放開旁分其翟家橋沙礮原屬應
行挑浚之工但下游五湖尚有勘議之處應俟下游工竣
再行一體疏通等因臣查今歲夏秋之間仰賴 皇上
洪福水不盛漲故黃河減下之水洪溝尚可容納倘將來
雨水稍多汎水長發巴河土壩若不開通則黃水不能分
趨洪溝勢難容受至翟家橋之沙礮相距五湖甚遠其下
游數里即屬睢河現在深通今若先為挑通沙礮則水歸

睢河不惟無害於宿州且沙礮之上二十餘里皆係宿境所轄田土亦免水阻之患似可不必待五湖工竣而後施工且續查蔣溝一河又於開通之後淤墊數里亦應再加挑浚除現在移商江省速為委員會勘逐一疏濬開放外但事隔鄰省勢多格碍其會勘開濬尚無定期所有豫省本境內應濬之河渠甚多內惟永邑巴溝河身淤墊之處應俟下游翟家橋沙礮開通再行挑挖其餘查與江省並無關涉者均應來歲春融先為乘時疏濬隨飭委管河道金山查勘估報前來臣遂加確核查永城縣有王家古溝一直在洪溝河之西其水向以洪溝為歸宿嗣因黃水漫溢將洪溝迤西舊道淤為平陸以致水無所歸節年民田被淹今應仍循舊跡開通以資疏洩又陳州府屬淮寧縣境內有灌河一道起自該縣之洪山廟下至范家橋入歸

德府屬之鹿邑縣境內即為黑河直達江南之太和縣河
道甚長諸水滙聚兩邑百數村莊之水俱藉此二河宣洩
近年淮河淤墊不堪黑河底淺岸低每遇大雨時行即致
泛泉為害又鹿邑縣之清水亦起自淮寧下達江南亳州
之肥河現在兩邑河身均多低淺逼窄今應將淮河挑濬
寬深俾上流通暢其下游鹿邑縣之黑河以及清水河地
勢低下未便概行挑挖以致愈淤窪下應將最低之處各
於兩岸加高堤堰束水下流其河底稍高者仍行挑去淤
土則谷水俱可暢行不致阻滯漫溢其餘淮寧縣尚有沙
河清流河柳沙河蔡河及鹿邑之三里河八里河急三道
河小清河或堤岸單薄水易出漕或間淤墊未能暢洩均
須幫培修濬一律堅厚深通俾各邑之水患稍甦似於民
生有益以上土方工料約計需銀八九十兩除飭令藩司

確估造冊咨部興修外緣水利關係民田時屢 聖懷
合將臣分別辦理緣由恭摺奏 聞伏祈 皇上睿
鑒

請復河工舊制疏乾隆八年

尹繼善

太子少保署理總督兩江等處地方軍務兼理糧餉兵部
尚書兼都察院右副都御史協辦河務臣尹繼善謹 奏
為河務商酌已定舊制亟應請復仰祈 睿鑒事竊查

江南河務攸關重大時屢 聖懷臣等欽承 恩命

同任河防每恨識陋才庸常恐措施未當夙夜靡寧寢食
幾廢前會同大學士臣等遵 旨細加講論業將毛城

鋪壩大然二壩及高郵三滾壩應行酌商緣由恭摺奏明
在案但臣久離江南恐河道情形今昔不同隨會同臣白
鍾山前往洪澤湖之高堰山圩等處並高郵寶應一帶地

方上下細加查勘通盤籌畫考古證今彼此反覆詳議者數日然猶不敢自信恐途復博採輿論體察民情並詢之通工文武大小屬員及地方等官咸以舊制宜徇為目前急務衆論僉同如出一口所有臣等前奏三條實有不得不因時制宜酌量變通者敬為我皇上備悉陳之

一毛城鋪之應請仍復舊制也查黃河自河南榮澤縣以下河道俱寬至數百丈迨至徐州北係山嘴南係郡城中夾河道僅寬六十餘丈以并支萬派數百丈之水納之數十丈之中繁繁束住不能暢流下流不暢則上游必壅是以前河臣靳輔相度機宜於徐郡上游酌量分洩南岸則於毛鋪設立減水壩下疏引河以洩盛漲北岸則自奪道華家樓以至蘇家山止九十里地勢原高之處不設堤工聽其漫漶過水歸入微山湖由荆山口入運南北兩岸分

洩俾浩浩無涯之水得以少殺其洶湧之勢數十年來未嘗為患近年以來恐毛城鋪進水過多圍堤築壩層層堵閉因此南岸日漸淤高北岸遂漸刷低黃河大溜全行側注北岸以致北岸石林一帶處處受險前經

欽差大

臣等議奏毛城鋪壩減洩之水下達五湖至洪澤湖幾四百餘里路遠勢緩淤沙暫停清水至湖藉以助清實屬有益無損自應遵守舊制又恐進水漸多復令將壩門水底用亂石填高是蓄洩機宜未嘗不為籌及但查該處洩水之路現今只有倒勾河三道其餘進水支河俱各淤平則所洩之水較前尚不及十分之一而況河唇淤高進水無幾若再將壩口水底用石填高則雖有遵守舊制之名仍與舊制不同雖有隨時啟閉之名實與緊閉無異今石林雖築而南岸之毛城鋪並不能洩水則北岸九十里無堤

之處受全黃之水勢在在堪虞且石林旁潰之後河底未免淤墊若再無分洩之所則上游東省州縣下游徐沛一帶城社更為可慮如慮毛城鋪照前舊制遇水恐經由上江近河處所以及豫省之永城或受黃水之患不知黃流減下之水向由五湖以歸洪澤本有去路即或其中間有河道阻塞並堤堰單薄之處業經臣等委員上下查勘只須少為疏浚加築便可一律暢流自無妨礙至永城地方原有洪溝等河可以容洩又兼祝家水口層層堅堵無從進水並不為害臣等再四籌酌謹請將毛城鋪壩仍照舊制相機啟閉將倒勾河道開通順直並將從前所築壩堰有礙宣洩者量為平撤如此南北兩岸分流減洩勢緩水平則北岸之險工可保上而東省之滕峰金魚等邑下而江省之徐沛一帶可以永享成平之福而且毛城鋪減下

之水歸入洪湖濁沙停淤黃澄為清更可助清敵黃轉害為利是一舉而裨益無窮所有議填亂石之處可以無庸施工以免阻塞此實治黃之一大端也

一天然壩之應請仍復舊制也查淮水自河南固始縣入江南霍邱縣境挾七十二山河之水匯歸洪澤一湖勢甚浩瀚所恃高堰一線孤堤為淮揚保障關係匪細一至夏秋黃淮並漲洪湖之水往往長至數尺以至丈餘不等拍岸盈堤勢難容受是以前河臣靳輔建三滾水壩為之分洩又擇土性堅硬如石之處設天然南北二壩酌量開閉以洩洪湖異漲之水以保淮揚一帶地方思深慮遠區畫實為萬全前經欽差大臣等議奏以洪湖之水宜蓄而不宜洩恐天然壩徹底開放必致清水受虧若永行堅閉又慮出格之水湖不能容請將天然壩改建滾水石壩

後照山盱三深壩之式量高一尺不致過水太多於洩水之中仍寓蓄水之意未嘗不善但近年以來上游之河南省將曹魯河大施疏浚倍加寬深悉歸淮河水勢較前更大當伏秋二汛淮黃並漲之時若不將天然壩開放則尾閘不暢肚腹必致中滿是未受蓄水之利而先受蓄水之害矣雖改建石壩亦屬洩水之一法但查舊有之天然二壩本係土壩相度水勢之大小酌量蓄洩不致過多過少其操縱全在乎人今改為石壩則一定不移無可增減如遇水勢雖長而尚應蓄水歇黃之時石壩業已過水不能阻遏如遇水勢盛漲必須多為分洩之時又限於石壩攔截不能多過是當蓄而不能蓄當洩而不能洩也若夫天然壩雖係土壩其堅如石平常之時自當加意收蓄不使涓滴外洩而異漲之時又當視水勢之大小酌量尺寸相

機開放何至任意挖掘以致徹底傾洩況數十年屢經開
放不知凡幾壩底並未冲深臣等親往查勘舊制依然此
其明驗也臣等再四等酌應將天然壩仍照舊制不必更
改所有估建滾壩及滾壩南北之石工亦無庸建築不但
節省帑金二十餘萬兩從此洪湖異漲之水有所宣洩高
堰全堤可以永固淮揚一帶可以保全其有益於數百萬
民生誠非淺鮮此又治淮之一大端也

一高郵三壩之應請仍復舊制也查高寶諸湖周圍數百
里上受天長七十餘河並洪湖減下之水匯入運河其勢
甚盛淮揚一帶州縣城池倉庫攸關是以於高郵迤下設
立南關五里車邏及昭關各壩以分注下河歸海實為湖
河洩水之關鍵最為緊要舊例遇水勢異漲之時相機次
第開放以洩異漲俾水勢陸續宣洩循序漸下制度甚為

精詳前經

欽差大臣等議奏以高郵南關等壩一經

開放則下河必致難受請將高郵三壩仍行永閉另於三壩之上下添建石閘四座復於昭關壩之上添建石閘三座抽板開放節制由人所以為下河計者似屬周至但查從前高郵三壩並昭關壩共寬一百九十餘丈今建石閘七座各開金門止寬一丈二尺共計止有八丈四尺較之舊制寬狹已屬懸殊且高郵等壩原與高堰山圩之天然滾壩上下相應今天然滾水等壩共有三百餘丈而添建之石閘僅止八丈四尺上游之來水甚多下游之去水過少勢必仍然壅積雖於邵伯進南疏浚入江之路亦係減水之意但該處距江甚近江湖朝夕往來與水相抵洩水無多而邵伯進上高寶一帶為諸湖頂衝之區首當其險設遇水勢驟漲自必直趨赴近就下之捷徑而豈能紓迴

流遠全洩異漲之水以入江倘宣洩不及運道民田城池倉庫均為可慮况高寶不能容納勢必仍掘壩以注下河洶湧驟至較之循序漸至者更猛則下河之受惠愈深此必然之勢也在永閉三壩之意原為下河與鹽地方形如釜底一經開放未免被淹不知下河等處各有湖蕩為蓄水之區又有大海為出水之路從前遇大水開放之時下河最窪之處雖間被水淹究屬有限今永閉以來而被災轉重得失利害已屬顯然臣等再四籌酌請將高郵三壩仍循舊例以時啟閉則湖河之水不致泛溢不獨淮揚一帶永慶莫安而億萬民田歲獲有收利賴甚溥三壩既不永閉所有原議之石閘七座可以無庸添建以省糜費惟念下河地方本屬低窪臣查欽差大臣等議奏之內入江之路雖已籌畫而入海之路緣議三壩永閉是以下

河宣洩疏通之處尚未詳議大學士臣陳世倌親勘之後
亦曾論及容臣等再遵委委員詳加查勘其中如有河形
曲折河身淤淺處所酌量疏浚深通近水民田應為修築
堤堰以禦水勢雖釜底之水不能全消而有餘之水可以
導之入海則下河一帶庶可免彌漫之患所需土方夫工
銀兩即在於停修閘壩大工節省銀內酌量動用毋庸另
請錢糧合併陳明

以上三條均關河防切要臣等悉心商酌至再至三毫無
疑義固不敢少存成見而好為更張亦不敢因前議已定
而潦草從事總期合舊制而順水性孚公論以洽輿情以
仰副我 聖主宵旰憂勞念切民生之至意於萬一耳

請酌賑民之法疏乾隆八年

孫 灝

協理山東道事貴州道監察御史臣孫灝謹 奏為採買

積弊已深暫停期收實效請酌銀穀兼賑之法以資補救
事竊過年以來米價無處不昂我皇上洞悉民間穀

貴之故由設額太多爭糴太衆特諭鄰省採買及捐

監收米之例一概暫停詔下兩月萬口歡呼頌

聖鑒之至明感宸衷之獨斷天下督撫惟有併力一

心仰承德音臣總總之慮特恐奉行失術而速效之

心勝之拘牽之論搖之也如諭旨存罷捐監存常平

則必有益銳於常平者以為捐監既停增額既減常平奈

何弗急不知捐穀幾等空名固未嘗為穀病也穀病獨在

常平且常平但求足額亦豈即為穀病惟其非一足而即

止一買而即止日積月累是以官民交困也此監例罷而

常平卒不可急者也又如諭旨存停買鄰省是舉尤

甚者而言則必有以本省為無傷者不知本省穀多惟江

西湖廣四川為然江南浙江穀雖多猶藉鄰省如福建廣東山西等省則甚不足者也今以鄰省停買之故盡返而趨於本省而州縣採之多穀之家也弊至無窮若零收市販則不穀封截商船則愈擾也爭買鄰省足以貴穀爭買本省亦足以貴穀矣此鄰省停而本省尤不可爭者也然臣竊觀今之建議者有二議救弊者曰必停採買議積貯者曰必實倉儲夫米之自賤而貴也以漸而長則其自貴而賤也亦必以漸而平斷未有二兩一石之米不旬月而竟減為一兩者則亦斷未有乍而停之不移時而又買之而米價即平於旦夕間者此停採買之說也然而常平之法有糴有賑然後有買賑即非常有之事糴則每歲必有之事假若一萬石之米歲糴其什之三今年停買明年復然是兩歲而已缺其十之六也又明年復然是三歲而倉

幾空矣如是而復買之而盡買之害豈有極哉此實倉儲之說也為今之計欲使暫停之速效勢既有所不能欲令採買之久停事又有所不可是非有術以通其變而議採買則慮其多議倉儲復恐其少議採買則惟恐其行之太驟議倉儲又惟恐其補之太遲是兩困之道也臣昨見少詹臣李清植條議請酌以銀代賑之法臣初疑其難行既而思之是亦救弊之一策惟將倉儲合算而無偏於用銀即調劑採買之法也夫常平之設賑糴兼賑之例上年江南者也賑不必定資乎穀者也查銀穀兼賑之例上年江南被災最重現在遵行其他宜無不可行者請嗣後地方遇有偏災其倉儲足供賑恤者仍照舊辦理其本地不足而他處可協濟者亦仍通融撥運外倘至倉儲不敷散賑酌量各該地情形或先儘穀再用銀或將銀穀分配奏給至

甚不得已全以銀代亦非權宜之必不可通者也然則銀穀兼賑其絕無不便乎不便則亦有之惟折銀或殊時價耳李清植現請

勅部酌議矣外此無不便也且有數便銀質輕微官易散給人易取携一便也穀貯於倉多虞霉爛銀則由是也設有侵扣立可查驗二便也貧戶得米而食亦必折薪而炊資其他費人尤德之三便也細民覓利術至纖微貸銀少許亦能謀負販逐錙銖穀之滯不若銀之通四便也雖有荒歲必無竭糧有穀而患無銀者矣苟有銀何患無穀五便也具此五便則有穀以資糶之用有銀以備賑之窮買可暫停非不買也而買之有漸矣額可徐足非終不足也而足亦有期矣再李清植奏稱康熙年間州縣倉穀雖不及額倘穀價現存既不以虧空論今惟歲歉價貴例得展至次年而連荒則匱於本地達購則

困於鄰封聚穀適以貴穀耳且如一州縣之中穀存至什之六七則穀不為少銀存但什之三四則銀不為多倉儲誠不容缺額而當此積困之際泰酌舊例暫寬處分仍督令陸續購足縱非蓄積之萬全亦或補救之一術況充類而言銀可代賑原非無用即糴不滿數猶無大妨何者持錢而糴究非無錢而升斗之為利尚小歲穀於民終非無穀而困廩之在官則偏也臣聞天地生財止有此數博施濟衆克舜猶難或者以為積貯大政毋議權宜盡亦思體聖主之憂勤訪民生之疾苦為天下全局計耶抑但為一方水旱計耶為年年歲歲之穀計耶抑但為一時倉儲計耶一方之憂一時之急亦斷斷不可無備而今直省所存三千一百餘萬石之穀固未至於無備也即備之偶缺猶有法以相濟也則今日至切至要之務惟力守一概

暫停之

聖諭為米穀流通計為委穀予民計為使民

自養計而天下已受其福矣若舍此別求他法斷無奇策可言而紛紛之論愈講求而為術愈左者也或又以為常平斂散得人穀必不貴故曰有治人無治法此亦徒托空言耳天下州縣千百安得良有司如許矧拘文法不自為政也考取壽昌常平起於漢宣帝之世其時穀賤農傷又築倉止於邊郡而增糴減糶其使民復如是然至元帝時郡國歲饑諸儒或議其可罷惜遂不行常壽昌之時尚爾况閱世久遠其能無弊乎臣愚以為常平法之良也採買之弊其人失也暫停則救弊者也法不可以不存而無惑乎因噎廢食之見弊不可以不救而弗疑於膠柱鼓瑟之談是則暫停採買必責之奉行之人寬以歲月畧與變通而後積弊可轉實效可收也

敬籌災邑積貯事宜疏乾隆八年

安 寧

江蘇等處布政使司布政使臣安寧謹 奏為敬籌災邑
積貯事宜以期有備無患事竊照江省淮揚徐海四府州
屬上年災傷甚重荷蒙 皇恩逾格賑恤除動用銀兩
外所有撥動存倉採買留漕並本省鄰省協濟之米穀粟
麥雜糧等項連未到之川米而計之共至二百餘萬石其
中有已為賑撫之用者有現為借籽之需者有留為本年
平糶之項者現今賑濟一事雖有成局然閏四月後尚須
察看情形再為酌辦而平糶一事當此災歉之餘米糧時
價昂貴正須多設廠所廣為減糶以濟民食前此撥動之
米穀等項將來賑糶之餘堪以留存備貯者甚屬有限伏
思此等災餘地方小民元氣未復即使歲獲豐收糶借尚
不能免況天時難必誠不可不設法儲備以為善後之圖

查淮揚徐海四屬均貯額穀共該五十四萬六千石今約
畧除去賑糶餘存之數而計之尚須購補十分之八計核
穀四十四萬石以一米二穀計算需米二十二萬石方為
有備無患此項米石購補固在於秋收而動項必須預為
部署在各屬將來雖有糶價可動然恐輟轉後時未能尅
期購足至於司庫雖亦有續收銀兩可以支應但上年賑
濟採買各項先後撥發過銀二百四十餘萬兩其中有暫
動銀六七十萬兩各有代支之本款須俟續收銀兩劃還
再此後之兵餉驛站工程戰船等項經費皆須續收接濟
若於秋後之前即欲動項採買未免左支右絀臣再四思
維上年豫省曾經先動該省庫項購買麥石接運回江隨
後解銀還項甚為妥便且上年淮徐等處災傷各省督撫
諸臣仰見我皇上痼瘵在抱宵旰憂勤無不代為籌

畫協濟視同一體今此購補倉儲實為災地要務諒不致於歧視況江省委員前往採買僅在產地一方不能四散分購且張揚其事每至牙僧居奇價值頓長若令產地成熟州縣俟新穀一登即分別購買可免爭買長價之虞今似應照上年河南之例將淮徐等處需購米石請在山東河南二省各購粟米六萬石江西湖廣二省各購大米五萬石先動各該省庫項於成熟附近地方照數採買知會江省委員賫帶水脚前往接運領回其動墊銀兩於今冬明春提齊該屬糶價並將司庫續收銀兩湊足解還歸款查徐海二屬民食宜於粟米應令就近接運豫東二省之米淮揚二屬就近接運江西湖廣之米酌量分派於該州縣貯倉備用在豫東江廣等省每處分購不過五六萬石不致昂價病民而江省庫項既免於掣肘倉貯又免於匱

之不通融緩急之間災地即可有備無患矣至江蘇等
屬州縣倉儲以上年留漕抵補撥協缺穀再俟秋收後嚴
催各屬將糶價買補齊全尚屬充裕合併聲明伏祈
皇上睿鑒

永定河北岸工程疏

乾隆八年

高斌

總督直隸等處地方軍務兼理河道兵部右侍郎兼都察
院右副都御史臣高斌謹 奏為永定河北岸添設滾壩
以資宣洩事竊臣於本月十一日自蘇州回率同按察使
方觀承永定道六格取道寶坻赴永定河勘勘下口並北
岸添建滾水草壩等事宜查本年永定伏秋二汛連次發
水甚大直浸南北堤根幾平堤面所賴下口通順無阻兩
岸石草壩共十二處俱過水自六七寸至二三尺不等分
洩既多下流復暢是以堤壩各工俱獲平穩減下之水復

有重堤攔束故民情亦無驚擾現在北岸三工六工七工共有新舊草壩五座但查三工之胡林壩至六工半截河壩相距七十四里之遠應於五工大盧家莊重堤之內添建三合土深水草壩一座以資宣洩金門寬十六丈其出水護堤壩外添築灰土簸箕等項共約估需工料銀六千八百八十餘兩應請先行動支天津道庫要工銀兩今永定河道六格即飭該廳速行採辦料物該道督率上緊堅固修築其工件確估細數另行造冊送部查核至下口范壩口以下統以沙淀為歸宿本年汎水歸業淀者約七八分歸沙淀者不過二三分而沙淀較業淀為更寬廣應將歸沙淀之路再行疏浚通順俾易容納所需工費即於歲設疏浚下口項內支用無庸另議動撥再查兩岸各草壩皆係葦土所築迥非金門閘石工可比或歲月稍久或汎

漲屢經外雖完好而其中已有陳朽不相附著之處倘過水之時稍涉疎虞殊有關係因向未入於歲修河員不免覲望今設壩既多減水有效自應立定章程以資鞏固查永定河原設有歲修銀一萬五千兩應請將新舊各滾水草壩俱令永定河道於每年春融之後汎漲之前詳加查勘有應修理粘補之處即入於歲修項內通融辦理一例報銷庶各壩要工均可收分減之益而無意外之虞矣

請開山林之利疏乾隆九年

陳宏謀

巡撫江西等處地方提督軍務兼理糧餉都察院右副都御史臣陳宏謀謹奏為請開山林之利以養民生事竊惟盛世滋生戶口日繁小民衣食之源所宜急講我

皇上宵旰勤求孜孜罔懈

特頒諭旨廣山澤之

利飭令因地制宜及時經理無非為民審日用飲食之事

臣仰體 德音凡有地利可以養民者悉心體訪設法興舉不敢畏難苟安坐失地利江西一省惟廣信一府開曠之山地最多而窮民無業者亦多所有地利可開二事款為我 皇上陳之

一廣信府有銅塘山坐落上饒廣豐二縣週遭數百里自明正統間有奸匪盤踞賊平之後遂將此山盡行封閉因名曰封禁山自此耕鑿易牧之地盡為絕無麋鹿之場矣臣到江西採訪輿論咸以此山允宜開禁以惠窮民上年三月臣檄行廣南饒九道李根雲帶同廣信府知府陳世璜並上饒令汪文麟廣豐令詹廣譽守備劉福等入山細加視勘知封禁山之內草木叢密路徑崎嶇山深廣闊澗水紮紆內中有田地邱段尚存者儘可為田其餘亦可種旋栽麻並植蔬果雖無杉楠佳木而雜樹竹木極其繁茂

山澗水溝順流而出皆可運至大河今久經封閉民生有
用之物置之無用已覺可惜且查從前封禁之地原屬廣
澗我朝承平日久附近居民漸於四圍墾植以資生
計今樹藝已蕃漸成村落現在所立界牌封禁者較諸從
前已窄非復舊時廣澗夫四圍既可開闢中間亦可墾治
若得弛其封禁聽民認界開採始則採伐竹木竹木既盡
其地即可種植有水可以成田無水可以成地十年之後
漸成沃壤然後陞科此外藝麻種靛栽植蔬果之類均可
獲利資生目下招墾須擇本地良民取具甘結其外來奸
匪不許混入且江西民風勤儉人多地窄得業最難山谿
崙側尺寸必爭今將數百里之地聽民為業人孰不踴躍
爭奮養活窮民不知凡幾至其如何約束使人不敢爭佔
如何稽查使奸匪無由託足皆可熟籌經理現在各隘口

原有官兵汎防將來事有成效人煙漸廣然後相其形勢
移官添汛以資彈壓庶幾事不繁而民不擾亦無藏奸匿
匪之患且蒙茸盤結之氣俾之開通得耀於光明亦昇平
之盛事也臣查從前奏請開禁者率以開墾挖銅採木充
公為言及查無銅礦可開無杉楠大木可取又以此山界
在浙閩二省可藏奸匪故其議皆格而不行耳臣愚以為
此山若為開礦取木充公則滋擾無益可以不開若聽民
為業資生則開之實為有益也至於此山離浙尚遠只有
南界連接閩省均係懸崖壁立攀藤附葛亦不能入必取
道江西並無浙閩通路之處如謂本省藏匿奸匪此等深
山大壑各省皆有際此昌期邊遠苗疆在在開闢此一隅
腹內之地永遠封禁棄為廢壤未免因噎而廢食矣凡此
皆從前封禁之由臣已一一等及者也合併附陳伏候

聖鑒

一廣信府之玉山縣廣平山地方產有鉛礦居民屢請開採臣行布政司飭勘嗣經廣信知府陳世璠帶同玉山令李鴻翔前往查勘廣平山離城一百四十里並與上饒德興二縣交界相離二縣均在一百數十里之外山之前後左右凡二三十里並無村莊墳墓亦無妨碍之處督令工匠先後開挖五硿俱有礦砂面加煎試銀鉛夾雜實有成效若准其開採所得礦砂無論銀鉛照二八抽課餘者聽民自相運售慎選本地殷實良民為硿頭招募本地民夫開採以本地之民間本地之廠不慮其來歷不明江西本產米之鄉今以本地之人食本地之米可無米貴之患又不動支工本聽民出資開採有利而來無利而去亦無易聚難散之患雲貴各省礦廠甚多慮無廠徒生事之處近

者廣東亦復開礦而各省礦廠大半皆江西之人今本省開礦更無滋事之慮也以天地自然之利為民生衣食之資所養窮民不少矣

請與直隸水利疏 乾隆九年

柴潮生

協理山西道事山東道監察御史臣柴潮生謹 奏為請轉救荒之常策為經國之遠圖措不涸之財源溥無疆之美利懇祈 宸斷立賜舉行事竊照河間天津二府自去歲亢旱荷蒙 皇上如天之仁截漕發帑多方賑恤地方大吏亦能仰體 聖意悉心籌畫俾小民不致失所加以入春以來 宵旰焦勞過於桑林之禱自然甘霖大沛可望有秋然臣愚以為此謂至恩矣猶未可為本務也夫謀國如謀家不可以近憂既解遂置遠慮於不圖治國如治身不可以標病既痊遂置本根於不問也古者

東南未聞王畿侯國皆在西北王畿不過千里餘遞減至五六十里地可謂狹矣一夫受田百畝周制六尺為步百步為畝僅當今三十六畝有奇田可謂少矣而祭祀之粢盛賓旅之既廩君卿百官吏人之祿入賑貸之委積戰陣之芻糧無不取給於此費可謂廣矣而其三年耕有一年之食九年耕有三年之食夫古之天下亦今之天下今何無備之甚也則以田制既已盡廢水利亦復不修平日則鹵莽而簿收一有急則待賑恤為活計而已矣伏請本年三月上諭養民之道在使之上順天時下因地利殫其經營力作以贍其室家非沾沾於在上之補苴救恤遂長恃為資生之策也為民父母民事即家事宜盡心勸課隨時區畫俾地無遺利民無遺力則家有蓋藏自可引養引恬俯仰不匱大哉王言真得足民之根本矣臣今

不敢泛引請即以河間天津二府之事言之查二郡之地
經流之大河三曰衛河曰滹沱曰漳河其餘河間府分水
之支河十有一蓄水之淀泊十有七蓄水之渠三天津府
分水之支河十有三蓄水淀泊十有四受水之沽六是水
道之至多莫如此二處故河間號為瀛海山東之水皆於
此而委輸天津名直沽畿輔之流皆於是而奔漚向若河
渠深廣蓄洩有方即逢此旱歲不能全收而灌溉之功亦
可救得一半即不然而平日之蓄積亦可撐持數月以需
大澤之至也何至拋田棄宅孀子携妻而流離道路者哉
雖其事屬已然言之無益然水利之廢即此可知矣方若
饑而與之談水利是可謂迂圖然上方賑饑而即藉
以興水利焉不可謂非善策也今甘霖一日不足則賑費
固不可已臣竊以為徒費之於賑恤不如大發帑金遴遣

大臣將畿輔水利盡行經理既可接濟賑民又可以潛消旱潦而且轉貧乏之區為富饒一舉兩得因敗以為功似救時之急務籌國之遠謀俱莫以易於此也臣請考之於古證之於今為

皇上一二陳之直隸為禹貢冀州之域田稱中中今日土壤乃至瘠薄東南農民家有五十畝十口不饑此間雖擁數頃之地常虞不給可怪之甚也雖其土燥人怠風氣異宜亦不應懸殊至此漢張堪為漁陽太守於狐奴開稻田八千頃民有麥穗之歌狐奴今之昌平也北齊裴延儁為幽州刺史修古督亢陂溉田百萬餘畝為利十倍督亢即今之涿州也宋何承矩為河北制置使於雄鄭霸州一帶興堰六百里灌田初年無功民咸病之次年大熟承矩犂稻米入都示朝臣謗者乃息邊民之食以充明汪應蛟為天津巡撫欲興水田將吏皆不欲應

蛟乃捐俸自開二千畝收四五石惟旱稻以鹹立稿於是軍民始信閘浙治田之法可行今東西二淀即承矩之塘樂天津十字圍即應蛟水田之遺址垂之竹冊非比荒唐又查國朝李光地為巡撫請興河間水田言涿州水沽之地每畝售錢二百尚無欲者一開成水田畝易銀十兩上年直督高斌請開永定河淤田亦云查勘所至衆情欣悅又臣聞石景山有莊頭修姓家遵殷實能自引渾河灌田比常農畝收數倍旱潦不致為災又聞蠡縣亦有富戶自行鑿井灌田愈逢旱歲其利益饒又聞現任霸州知州朱一蜚於二三月間曾勸民開井二千餘口今頗賴之證之近事復確鑿有據則水利之可興也決矣今請

特遣大臣一員齎帑金數十萬兩前往河間天津二府督同道府牧令分委佐貳雜職除運道所關及滹沱正流水

性恭急慎勿輕動其餘河渠淀泊凡有古蹟可尋者皆重
加疏浚而又於河渠淀泊之旁各開小河小河之旁各開
大溝皆務深廣度水力不及則止節次建立水門遞相灌
注旱則引水入溝以溉田潦則放開歸河以洩水其離水
遼遠之處每田一頃掘井一口十頃掘大塘一口亦足供
用其中有侵地及民地並古陂廢堰為民業已久者皆計
畝均勻撥還如此辦理民情自然踴躍樂從即將現在之
賑民與外來流回之流民停其賑給按地分段派令就工
逐日給與工值的濟二三口糧寧厚毋減一人在役停
其家賑糧二口二人就役停其家賑糧四口其餘口與一
戶皆不能執役者仍照例給賑其疏浚之處有可辦種者
即借予工本分年徵還更請另簡大臣一員齎帑金
分巡直隸各府一如河間天津二府辦理雖所費繁多而

實為畿輔無窮之利與議賑迥然不同然而或曰北土高燥不宜種稻也土性沙鹼水入即滲也挖掘民地易起怨聲也且前朝徐真明行之而立敗怡賢親王與大學士朱軾之經理亦垂成而坐廢可為明鑒也臣請又一一言之九土之種異宜未聞稻非冀州之產現今玉田豐潤杭稻油油且今第為之興水利耳固不必強之為水田也或疏或濬則用官資可稻可木聽從民便此不疑者一也土性沙鹼是誠有之不過數處耳豈徧地皆沙鹼乎即使沙鹼而多一行水之道比聽其衝溢不猶愈於已乎此不疑者二也若以溝渠為損地尤非知農事者凡力田者務盡力而不貴多語曰務廣者地荒詩曰無田甫田惟莠驕驕今不必言畝溝洫澮之詳一易再易之制區田代田之法也但使十畝之地損一畝以蓄水而九畝倍收與十畝之田

皆漸入孰利也必有能辨之者況損地又予撥還此不疑者三也至前人屢行屢罷者蓋亦有由徐真明有幹濟之才所言亦百世之利其時御史王之棟參劾出於奄人勲戚之意載在明史其疏亦載在省志不過言漚沔不可開耳未嘗言水利不可行也但募南人開墾即以其地予人又許佔籍左光斗之屯學亦是奪北人之田而又塞其功名之路其致人言也必矣至營田四局則成績具在公論難誣但當日効力差員亦不無奉行不善所以賢王一沒遂過而廢之非深識長算者之所出也況非常之原黎民所懼所貴持久乃可有功秦人開鄭白之渠利及百世而當時至欲殺水工鄭國漢河東太守番係引汾水灌田前漢書記其河渠數徙田者不能償種至唐長孫恕復鑿之畝數十石凡始事難成事易廢績以終之則是中道而

棄之則非此不疑者四也至水利既興之後或招募農師造作水器與夫逐年作何經理俾永無湮塞之處應聽董事之大臣詳加籌畫雖國家經費須存節省然皇

上視小民如赤子凡有賑恤縱千萬帑金亦無所惜即如現在開通京師溝道已估費二十餘萬以視興修一省水利輕重較然況此舉乃以阜財非以費財也請又為

皇上一一數之天災國家代有而荒政之設未有百全計口授糧僅救死而扶羸以工代賑亦掛一而漏百漏卮百出補苴無幾不知擲金錢百萬於水濱而立收國富民安之效雖有免災湯旱亦可挹彼注茲是謂無獎之賑恤連年米價屢賤聖懷盡停採買豈可久行捐監輸倉亦非上策若小民收穫素裕自然二鬴有資臣訪聞直隸士民有云有水之田相去不啻再倍是謂不竭之常平且近

幾多八旗莊地直隸亦京兆股肱皆宜置之富饒始可居
重馭輕漢武帝徙豪民於關中明成祖遷富家於帝里固
非王政不失深謀若水利既興自然軍民兩利是謂無形
之帑藏且兩者水土之氣所上騰而下澤也土氣太甚則
水氣受制故明臣魏呈潤徐光啟皆以興水利為致雨之
術其言固未必確然東南半壁未嘗接踵告旱而直隸自
近年以來閔雨者多矣謂政事之缺失乃 聖人罪已

之懷謏氣數之適然亦術士無稽之論其實天人一理理
數相因但使水土均調自然雨暘時若是謂有驗之調變
且水性分之則利合之則害用之則利棄之則害故周用
有言人人皆治田之人即人人皆治水之人先臣張伯行
亦主此論又陸隴其為靈壽令督民濬衛河其始頗有怨
言謂開無水之河以病民既而水潦大至他邑苦水獨靈

壽有所宣導歲竟有秋貨殖者早則資舟為國者備斯無
患是謂隱寓之河防抑臣更有進於此者今生齒日繁民
食漸絀苟舍此不為經理其餘皆為木節愚臣區區以為
盡興西北之水田盡闢東南之禁地則米價自然平減關
右立致豐盈但其事體至大請先就直隸為端俟行之有
效另籌長策次第舉行樂利萬年之基庶其在此伏乞

皇上與至忠憂國之大臣詳議舉行 畿內幸甚蒼生
幸甚

酌定安西營制疏乾隆九年

慶復

總督川陝等處地方提督軍務兼理糧餉兵部尚書都察
院右都御史承恩公臣慶復謹 奏為安西各營應請酌
量分轄以重體制事竊照各省提鎮除本城親操及城守
外所屬遊都等營多分隸於副叅兼轄提鎮惟為統制以

專事權如無可分隸者始隸徑轄緣安西設鎮之初惟沙州一協兼轄黃墩踏實二營都司其餘各營無可分管俱徑隸鎮轄至乾隆三年總兵豆斌因踏實營去沙州三百餘里去安西僅一百餘里奏請改歸鎮轄在案今善後事宜案內將安西改鎮為提並所屬之靖逆營亦改為協是安西提督所屬已有沙州靖逆兩協副將營制既多增添規模自非昔比而所屬零星各營自應因時制宜量為分隸查沙州一協在安西之極西各營相隔遙遠惟黃墩營相近應仍兼轄黃墩一營並本標左右兩營都司至靖逆一協在安西之東道路尚近乃亦止將赤金一營並新設之塔爾灣一營分隸餘仍歸於提督徑轄不特事務紛繁且與體制未協茲准安西提臣永常咨稱卜隆吉一營並所屬之橋灣營西至安西一百七十八里東至靖逆僅一

百三四十里應統歸靖逆協副將兼管再踏實一營雖距沙州爲遠而離瓜州營亦僅百里凡文書往來直達瓜州並無迂繞較之安西更爲捷便且查各省恭遊兼管都司者甚多現今撫摩營都司善後事宜業內議令卜隆吉遊擊兼轄遊擊尚可兼轄都司何況恭將於營制尤屬無碍應將踏實營改歸瓜州營兼管庶諸事得以責成兩協並瓜州一營便於稽查料理等因前來臣詳核道途揆之形勢提臣永常所議似爲允協請將卜隆吉營並所屬之橋灣營就近統歸靖逆協副將兼管而踏實一營亦就便改歸瓜州營恭將兼管一切事件俱由該副查察核轉提臣仍統爲節制則層層稽察營務益加嚴密無事之於操防有事之於援勦均有裨益而於現在不過一爲改隸章程即可永定並非有所紛擾實爲妥便者也

請嚴禁派累營兵疏乾隆九年

胡寶琛

協理山東道事福建道監察御史辦理軍機處行走紀錄
一次臣胡寶琛謹 奏為請預嚴派累之禁以恤營兵事
近蒙 皇上特遣大臣前往河南等省查看營伍所以
核訓練之方杜廢弛之漸使戎行皆成勁旅而積習從此
永除實於營制大有裨益臣竊以各處營兵雖不時差操
究不免因循懈怠封疆大吏有控制之責而耳目難周即
乘便巡查該將弁一聞此信惟圖掩飾一時不過使旗仗
鮮整行隊分明演陣一次便可了事而其修理戎器刻期
墊補不無借派扣抵之累皆向來之積弊此次 欽差
大臣查閱其器械之堅脆技勇之生熟人數之虛實糧馬
之虧盈自難掩蓋惟是積玩之處旗帳甲冑弓刀馬匹之
數此時間風修整買補以蔽前愆勢所不免不肖營員或

乘此借端苛派或此後坐扣月糧俱未可定伏念我國
家養兵恤士愷澤覃敷既裕之以名糧又加之以生息各
處士飽馬騰咸仰藉 皇仁永資惠養若不預禁其派
累或致兵丁坐虛數月之糧即有妨於生計臣請 勅
下該部即速行文各督撫提鎮等嚴飭營弁通行曉諭毋
得臨時派擾事後坐扣如有前項情弊立即查叅倘容隱
徇庇或經 欽差大臣糾劾或被確訪奏 聞將該
管上司一併嚴加議處如此則戎政肅清毫無滋累各營
士卒自必益加鼓勵矣

請修楚北堤工疏乾隆九年

鄂彌達

刑部尚書署理湖廣總督事務臣鄂彌達謹 奏為楚北
堤工最要謹陳修築事宜恭請 聖訓事臣惟全楚吐
納衆流而楚北為尤甚現於議覆臺臣張漢請疏水道摺

內將江漢情形備呈

聖鑒竊以爲疏洩之法勢固難

行而修築之功實不可緩武漢各屬城郭都會逼臨水次環水而居者半以水邊地畝爲生涯全賴堤塍以資保護其險要之處有亟宜增築防衛者謹分晰言之武昌郭外江面約寬七八里許受荆江湘江之洪流自洞庭太湖直瀉而下勢如建瓴繞城之西北而東注其城西之望山門至城西北之草埠門業蒙 聖恩砌建石堤聯續鞏固惟城西南之保安門外有金沙洲中腴壤滿目烟戶約以萬計洲之左偏爲蓊蓊麥灣際臨大江向有老堤一道長二十五里外防江漲內衛民田實金沙之堤防即武昌之保障也祇緣江流衝激日漸崩坍乾隆二三年間卸去堤身六十八丈剝進堤脚二百餘丈嗣復於老堤內築月堤一道然而工程單薄江勢洶湧久經衝決至今尚未修築

昨臣親往蕎麥灣一帶踏勘江岸情形如屏似削堤之不絕者如綫詢知金沙一洲歷來有街八道今已潰其四道若不及今堵衛不獨洲內民廬地畝將胥而為水而江水直灌城根即現在沿江石堤恐亦難免衝刷之患臣相其地勢須再退入灣裡築大堤一道先於根底密釘排椿填築以固其址然後於上增高培厚庶永為不拔之基此武昌堤工之最要者也臣又查漢江險工莫如安陸府屬之沙洋而沙洋之險又在水府廟鄭家潭等處現今動帑修築沙洋大堤二十里足資捍護特是漢水日就南滾每遇伏秋汛發堤腳難支昔人於險處每築一堤必退築月堤一道或兩道重層障禦所謂一包三險也今涉洋之堤除舊有月堤者不議外如鄭家潭水府廟諸處並無月堤目今堤身頻近河干不過數弓設遇暴漲人力難支亟宜添

築月堤此安陸堤之最要者也伏查蕲麥灣之堤估計約需銀一二萬兩沙洋之月堤計長二千餘丈需費約近三四萬兩前督臣阿爾塞現經題借帑本一萬兩營運以資歲修臣請再借帑銀四萬兩合之前次成本共五萬兩分交武漢行銷按照每月一五生息每年可得息銀九千兩不過三五年間兩處大工次第克舉陸續歸還成本臨期酌量留存以為逐年歲修之資其於國帑既無虧損而楚省人民之仰戴聖恩實無涯矣又查潛江天門二邑

縣治地勢低窪一遇大漲浸城過半現在檄飭修護城堤第潛沔諸州縣均係接畝派夫其在豐稔無事之年尚可奮勉趨事設或堤岸潰決又值年穀不登伊等謀生不暇碍難計畝科工往往公則官墊私則民貸否則束手無策臣請於現在捐監穀石撥十萬石分貯沿江各州縣常平

倉內名曰江防倉穀或遇堤決歉收之年按堤計夫酌借無力窮民俾得踴躍赴工俟工畢之後按年徵還於倉貯無虧於民生有益此亦沿江州縣之要務也又襄陽府之老龍石堤計長十里古有子堤重重逼近府城現今子堤已多坍塌每年著落地方官粘補僅歲修銀三百餘兩實不敷用查襄陽府庫內有軍需銀二萬兩積年收貯臣請撥五千兩交襄陽府當舖生息每歲可獲息銀九百兩合之歲修銀共可十餘金以為頻年修築之用官不費而民無累亦地方之利賴無窮者也

皇清奏議卷四十

考覈吏治實效疏

乾隆九年

訥親

太子太保議政大臣領侍衛內大臣吏部尚書協辦戶部
兼管三庫事果毅公臣訥親謹 奏為酌定考覈之法以
崇實效事竊惟吏治責有實效奉行務去虛文外省自督
撫以及各州縣皆有應盡之職守而州縣為親民之官凡
教養大端能盡一分實力則百姓受一分實惠加以督撫
綜覈得宜自於治效有裨今行禁止有月異歲不同之象
乃外省於地方政務非不遵循成憲辦理克勤然浮文常
多實意殊少如欽奉 上諭暨內外臣工條奏應行事
務在督撫大吏蒙 皇上特簡之恩膺封疆之寄固皆
恪遵罔懈督課維嚴由督撫司道行之州縣行文出示亦
復鄭重嚴明然於行文出示之外求其遵奉之實際則十

無一二相沿日久大概皆然從前蒙

世宗憲皇帝降

旨令各省督撫每年於十二月將奉到事件各條各款如

何施行及行之如何已有成效繕本具題蓋蒙

世宗

憲皇帝洞悉外省因循積弊藉以儆省振刷之意乃行之

既久又復視為故套不過令書吏隨例填寫既鮮稽核之

實有違違職之義臣之愚見似應將具題成效本章停止

竊思

朝廷良法美意凡以為民也但其中有未能期

效於旦夕必行之既久而其效始見者亦有實力奉行即

可收實效者如興學校端士習振民風及農桑樹畜河渠

水利諸善政皆所應行其造勉燒鍋賭博健訟刁悍諸事

定例甚嚴皆所應禁然當因地制宜從容觀效未可以期

之旦夕也至於盜竊打降及崇尚邪教等事關係於民生

風俗不可不為急除果能力為整頓固可旋至而立效也

其所以行之而無效者蓋以各省州縣惟以簿書錢穀為事其於境內戶口之貧富地土之肥瘠物產之豐歉民情之趨向習俗之美惡以及山川原隰橋梁道路一切漫不經心官之與民條教之外既無餘事民之與官納課之外漠不相關上下之情不相聯屬安望其令行而禁止乎且請勅下各省督撫酌量各州縣地方之大小事務之繁簡定以一年半年之限令該州縣官徧慰境內鄉村逐一體訪確實各就地方情形將某事所當興舉某事所當整飭行之有無效驗之處據實造冊詳報該上司即據此以為考核歲終督撫將通省某某州縣某事興舉若何某事整飭若何有效無效核實具摺奏聞如此則為州縣者知上司之考核以實不以文則凡職分所當為考成之所係自必實力奉行不敢虛應故事况百姓之休戚果

能相通地方之情形又能熟悉其平日一應戶婚田土詞訟錢糧自易於措辦可省案牘之煩即猝遇水旱不齊亦可斟酌緩急措置得宜則事事皆為實政於吏治民生不無裨益矣

酌定舉人揀選之法疏乾隆九年

訥親

太子太保議政大臣領侍衛內大臣吏部尚書協辦戶部兼管三庫事果毅公臣訥親謹奏為酌定舉人揀選之法以重吏治事竊照州縣為親民最要之官任兼教養得其人則一方就理非其人則百姓失恃督撫與之共治一省司道府之表率糾稽皆以牧令為政教之所由起也一州一邑之事雖不能言治宜無不周知臣此次奉差外出於經過州縣詢以地方事務有尚能應對者竟有茫然不曉者問其出身多係遠科舉人或精力就衰或見聞本陋

以該員等之材質觀之即使勉強供職其於地方必多貽誤蓋達科舉人需次常二十年去揀選之日已甚久月選後九卿驗看甄別其老邁衰庸之員以教職改用其未經九卿舉出者引見之時皇上量其人材分別員

缺繁簡調補此等人員

皇上念其請書垂老姑令赴

任督撫察其不能稱職或奏請改教或叅劾降調然亦須待至一年半後始能試看得實而此際之事務廢弛已屬不少且更換一官新舊委署之間交代紛煩官經數易民不相習均於吏治有妨臣思姑息在一則貽誤在一方有不得不為變通籌畫者查從前舉人有分部學習之例後經部議以部中事務與外省州縣不同諸凡錢糧刑名催科聽斷之法自須因地制宜隨時變通非必在部行走方可學習等因停止在案竊思部務與外省體制雖有

不同而所辦即係各省之事其理無不可通學習人員即不能實有諳練而出入聞見之間自必知識漸開舉動稍嫻其於服官之資不可謂其無益查近省現選至康熙五十六年丁酉科遠省現選至雍正元年癸卯科該員赴選之時雖例係本省督撫驗看咨部方准以知縣選用但知縣定例不用本省從前督撫多因無關所屬吏治姑為優容且距驗看之時已經年遠未可據為憑信應請暫停銓選行文各省督撫將現在屆選舉人情願領咨赴部者再行加意揀選年力尚強人才可用方准給咨赴部臣部覆加驗看簽派各部學習行走其已經在部投供之舉人等亦暫停銓選令九卿驗看甄別分部學習均於一年期滿之後如才具可用該堂官出具堪勝縣令考語具奏請

旨仍交臣部按其科分名次照例選用其有科分在前

期滿在後並科分在後期滿在前者統歸各本科挨次銓選如遇外省需人臣部將前項舉人同前項應行挑選人員一體揀選引

見請

旨發往該省遇調補所遺

及應歸部選之缺准其酌量題補再查現在投供舉人既經暫停選用其應得各缺應統令進士暫行抵選並請嗣後定於各省舉人應選科分之前二年臣部行文各督撫照例陸續揀選送部分派學習期滿具奏咨部選用其不入揀選不稱保奏之人俱以學正教諭銓選有情願告降訓導者准其告降挨次選用再查教職各官有董率士子整飭文教之責臣見現今各省教職亦率多精神衰邁言語恍惚其文理之荒疎亦可概見以之秉鐸司教斷難勝任細查各項教職內係進士拔貢等項出身者尚多年力壯盛之人其恩歲等項貢生出身者類皆衰老難用應請

一併酌議何項照舊銓補何項停其選用並於銓選之前作何揀選甄別詳細酌定俾縣令既各稱其才能教職亦悉盡其官守庶牧民教士均屬得人而國家設官分職之意亦盡收實濟矣

勘視浙江海塘疏乾隆九年

訥親

太子太保議政大臣領侍衛內大臣吏部尚書協辦戶部兼管三庫事果毅公臣訥親謹奏為遵旨勘視浙

江海塘情形等事乾隆九年正月二十二日奉 上諭

海塘情形亦著訥親就近由江南前往勘視欽此臣於四月十三日自浙江省城先至海塘觀看潮勢次看各處塘工自章家巷以西至杭城之南係土塘二十餘里塘外老沙綿亘久經民灶種植現在阡陌彌望其章家巷以東一帶柴塘自華家街西與土塘相連二千四百餘丈塘外老

沙寬自四百餘丈至三千餘丈高處與塘平甚屬穩固華家街東與老鹽倉石塘相連一千八百餘丈上年因湖水臨塘間段建築竹簍壩高五尺以護塘根今亦添有高沙五六七尺不等埋簍不見高沙寬三四百丈並外漲新沙共一千餘丈海鹽城外遠塘高沙有生草者自鹽邑西至老鹽倉東至尖山東西兩塘新舊石工梯比鱗次塘外高沙寬自百餘丈至八百餘丈高沙之外新沙寬自四五十丈至四百餘丈通勘全塘自尖山以西直至杭城一律沙護塘根溜達沙外現在各工實屬安穩至老鹽倉迤西柴塘現經議准改建石塘每年以三百丈為度分年分限漸次辦理等因在案臣細閱塘工情形惟視海沙坍塌以為平險老鹽倉一帶柴塘向因江海迴流乘潮冲刷遂成險工初非正溜移注故一經淤灘即得化險為平但潮患常

在北岸漲沙每被衝溢未可盡恃且細加查詢浙省江海
水潮向由蜀山之南中小鹽山出入其近海鹽之北大鹽
近蕭山之南大鹽悉皆漲沙寬濶是以杭紹二郡共慶安
濶迨後中小鹽漸就湮塞江海大溜悉由蜀山之北一日
之間潮汐再至江流逆遏其上受阻之迴溜與洶湧之潮
勢兩相激盪兼以潮至多挾風雨東南風狂則水勢全趨
北岸故衝激漫溢種種為患若將中小鹽故道開濬深通
俾潮水江流循軌出入分減北大鹽之溜勢則上下塘悉
可安堵無庸多費工築實為經久之圖即中小鹽有不能
遽行開通之勢查潮汐情形與湖河等水迥異其日月衰
旺既有期信且隨長隨落為時非久當其暴至固費防護
及乎甫退便可施工若將險要處所酌量機宜多建坦坡
木石戲壩俾其挑水掛淤實為捷要之法如盤頭稍越塘

外竹簍列置塘根即可擋浪掛沙乃其明效蓋有高沙則塘根即資鞏固有新沙則高沙不能坍塌柴塘一帶若辨理宜使沙益堅積水不通流不但必改建石工向後並可免搶險之勞費是惟在該管員弁平日隨時相機善為經理以期有備無患不可盡恃沙漲以為安亦不可妄矜潮汐以為險也至鹽平二邑東接江南之金山縣界舊有石塘俱經隨時修補足資捍備蓋因該處係暗潮增高不比仁寧有江寧相激之猛故塘工歷久不致大有坍塌再紹興府屬之山陰會稽蕭山餘姚上虞五縣沿江沿海塘工節年修搶支銷有案詢之撫臣據云現在並無坍塌缺總因江海大勢下趨南岸故各處堤工易於培補也至於新築魚鱗大塘石工六千九百餘丈內附土塘兼以外擁漲沙將及塘身之半與舊有石塘一律綿亘尚屬完整現據

該撫報部查銷在案所有臣勘視浙江塘工情形理合恭摺奏聞伏乞皇上聖鑒

敬籌河湖蓄洩機宜疏乾隆九年 訥親

太子太保議政大臣領侍衛內大臣吏部尚書協辦戶部兼管三庫事果毅公臣訥親謹奏為敬籌河湖蓄洩機宜仰祈聖訓事竊臣奉命查勘江南河務會同

署督臣尹繼善河臣白鍾山暨按察使方觀承徧履河湖通籌全局據臣愚見所及與督河二臣公同詳酌復於回京之便順道與河東河臣完顏偉直隸督臣高斌覆加講論以期詳慎今將督河各臣所見謹於各條之次一併備敘恭摺具奏伏祈皇上聖鑒勅議施行

一湖河歸江歸海不能通順情形宜備陳也查洪河上承全豫之水並鳳泗諸流源長勢盛平時全湖專注清口會

黃入海並分入運口以濟漕運長流由瓜州入江如遇漲發則由三滾壩減經寶應高郵邵伯等湖歸入運河分注泰州之鹽運河歸江興鹽之串場河臣至運串場二河查看通江通海各路次至運河次至高寶諸湖最後至洪澤湖詳審上下流相承之勢因查洪湖正溜由老子山前自西南注東北從裴家場等引河以達清口若當漲發之時正溜來水湧盛運口重重關鎖惟清口一處出路其三滾壩減出之水乃其洄溜餘浸是以宣洩不及適遇西北風起高堰全堤存在受險且湖水過滿淮濬等河水不下又每溢而為慮風六泗境內之患此洪湖減洩不暢上游易致為患之情形也至減下之水由高寶等湖至邵伯湖入運者則有泰州鹽河為歸江之路通江新舊河港八處新河尚未過水舊河如泰塘百汊白塔等河僅屬港汊洩水

無多惟芒稻一河最為寬暢而鹽河水深四五尺僅足鹽船之用芒稻開開即有碍鹽運本年四月運河水稍盛河臣甫行開放鹽臣旋又封閉循是以往既不能預為容受之地及臣來此而水已多開放又復不及不免壅遏運河為患此通江之去路猶未順也其水由高郵湖入運者各開壩洩入官河至蚌蜒梓新車路白塗海溝等河入於串場河為歸海之路通海十一閘以白駒天妃為暢順亦因串場河為運鹽孔道河水僅深二三尺白駒等閘專事閉蓄以資鹽運幾成虛設官河及梓新各河率皆淺狹容納無幾湖蕩潯泗不能即下先已浸溢民田因有以河為壑之說不知下河原屬閘尾之地但未除其險阻自難以資宣洩遂謂興鹽釜底水不得出又謂范堤閘下引河常為海潮屯阻臣將興鹽上下河道淺深及節年過水情形

詳加詢考地勢固屬窪下未至形如釜底水由各閘穿範堤而出就下之勢甚順各閘距海遠一百八十里近亦八九里潮汐常不及閘數十里間有清水外出遇潮阻回然潮落水亦隨下並非有碍水道陳說相沿尚少經畫此通海之路猶未順也江海去路既不通順秦河下河各溪港盡成止水洪湖減水之由高邵等湖入運者穿運東注不能消減且復貽患下游因而洪湖不敢輕言宣洩然蓄閉過甚驟有浸溢上游受患並及下流此下游歸江歸海未順之路所當急為籌議者也

一歸江之路應濬鹽河以資輸注也查鹽河上流水深四五尺如皋以下益淺其底原高於運河應從現在河底以下挑深五尺南至通州城河東至堰河均須一律深通使芒稻等閘壩以下常存之底水即足以資鹽運然後視運

河之水幾尺以上為有餘將芒稻等閘酌量應行開放陸續預為減洩再將寶應高郵二湖相連之華家灘大新河高郵邵伯二湖相連之王家港茅塘港並邵伯通運引河俱逐加挑浚俾三湖循次灌注以達運河鹽河由各閘啟放為湖河遞減之法每年於重運過後四五月行之如高寶等湖本境俾有續至之水以來抵去仍無所增加即遇洪湖減洩盛漲亦差可容受不致有湖河先滿之患而芒稻各河沛然通流更無宣洩不及之虞矣鹽河內通江新舊河港現議建築閘壩今於鹽河挑深之後應否建築並高低合度之處應令督河二臣再加詳度妥辦又通州境內通江之路如任家港等處原有唐家鹽倉等閘以資啟閉今因水淺淤塞應並挑浚以備宣洩又運口以內之水較湖水為渾現在進水亦多查有歸白馬湖之文華等閘

在通濟運越河之傍舊係分洩運河餘水河身長八十里
形勢甚為順捷今應於越河堤下開通口將閘座稍加修
理並疏浚河身以備運河上游宣洩盛漲之一路

一歸海之路應浚串場河以資容受也查洪湖入運之水
上流有餘則由高郵閘壩下注官河洪湖盛漲之水如不
及由邵伯歸江亦自高郵湖港入運下注官河由官河至
興化分由梓新車路白塗海溝界河以達串場河又邵伯
頭二等閘水恒子淶洋等湖亦分由蚌蚌以達串場河出
天妃白駒以及小海丁溪各閘歸海乃下河宣洩之要道
臣查勘五月水盈之時河水僅深二三尺即使水長滿岸
不過五六尺白駒等閘常閉不開興化各湖河水無去路
稍增四五尺即至淹沒為患蓋興化地窪串場河淺之故
也應將鹽城以南南北二串場河道挑浚一律寬深務使

一河有數河之容水恒足儲蓄足資鹽運白駒等閘平時不相機啟閉盛漲則普同開放閘下河俱就現在河身酌為疏濬以順其勢其興化以上之高郵官河承南閘車運二壩為減水總泄之路由通湖河乘舟查勘河道淺狹現在水深二三尺出水堤埝高僅二尺餘實難容納除挑浚極寬深並蚌蜒梓新車路白奎海溝興鹽界以及東西官河諸洩水要道均應酌量開浚寬深以資利導下河各水道將來既俱深通南閘車運二壩又已改為常開之滾壩分運河有餘之水正應隨時多令減洩今督河二臣奏請將壩面俱加高五尺臣即將壩脊河底驗量須一丈二三尺始能過水三壩之下水至一丈二三尺則遮下昭關邵伯等處即深一丈四五尺上游水亦過旺堤岸俱恐受險臣與督河二臣面加詳酌應如所加五尺之內去石二

塊共減二尺四寸今新加壩脊至河底合計總不出一丈之內運河水深一丈以上即令過水則蓄洩多寡適宜而兩壩歸實用矣再查邵伯以上水由運河東岸各閘壩歸下河者合計車運南閘二壩並新舊各閘洞口約共寬一百四十餘丈范堤為閘口門僅寬三十六丈來水多而去路少湖蕩迂迴易滋泛濫應於范堤一帶酌照芒稻閘式於現在閘座多添金門即會入現有引河出水應令河臣相度妥議辦理

一天然二壩原議恐徹底開放必致清水受虧若永行堅閉又慮出格之水湖不能容請將天然二壩俱改建滾水石壩照山盱三滾壩之式量高一尺不致過水太多等因覆准遵照在案尚未興工臣查湖河地勢儘南之天然二壩儘北之武家墩俱較古溝六安溝一帶高七尺餘較高

堰高六尺餘淮水入湖正溜先至古溝六安溝低處然後分溢武家墩高堰外灘其浸及三壩天然壩外灘者乃其迴流倒漾如遇異漲老子山浸溢分注之水亦倒漾及此其上流來水如清口溝蔣家閘以南約二十餘里天長盱眙二縣境內憑水並聖人山前途漲分流俱由此北入湖內凡此皆於湖內為餘水宜今早為減洩否則合正溜餘水全湖漲滿三滾壩宣洩不及則下流壅積武家墩一帶運河開壩僅隔一堤危險堪虞而上游蘆鳳諸水不能即下並致淹浸為害況水出清口交匯之地河身寬四百餘丈清水過盛佔流四分之三逼黃路窄阻截不能暢下毛城鋪王家山減下之水必多又復歸入洪湖以助漲勢來源多而去路少清水漲盛之情形大率如此自乾隆七年水患之後天然壩有不便永閉之勢即相機開放亦恐臨

時徹底過水為患因議改為滾水石壩與三壩並資宣洩
壩身比南滾壩高一尺是於開放之中仍寓收蓄之意但
水由北壩中滾出即係應減之水復經南壩然後於天然
二壩則非應蓄之水可知今若將二壩加高水去仍遲仍
恐淮河上游及武家墩運河等處清水壅積並阻遏黃河
為患臣之愚見應將天然二土壩改與南壩相平於南壩
過水時亦令過水庶可及時宣洩以除上下游壅遏之患
至此處地亢灘高迴流水緩且係水長自過應即因土壩
之舊可以無庸改建石工向來相傳二壩土性堅實過水
不刷因名天然臣看壩土雖屬膠垣加以夯礮堅結然過
水之後難保不冲刷但使刷有溝港隨時堵築尚易為力
臣見洪湖水決二丈餘之坑坎未至堵閉過難洩水太多
以致春有黃水倒灌之患則此三尺之土工操縱亦儘可

由人若如向來所聞過水不刷設遇異漲開放而自壩以西至堤根不過三尺餘深所洩之水亦屬無多且與從前屯積多水然後開放水勢緩急迥不相同況下游去路業經通順亦不為害二壩既不用石工其沈家西林家西磚石等工俱應一併停止再高堰舊有二堤現議加築高厚以資重障臣查所加尺數仍遠不及大堤之高而兩堤之間相去甚促二堤之下在在坎窪取土尤難萬一大堤致有疎虞乃恃二堤捍禦則已成河工大患且上游天然二壩若經理妥協可以及時減洩不致下游壅遏則周橋以下自鮮他虞二堤工程儘可停止不必多有糜費臣將此條商之河東河臣完顏偉據云天然壩改與南壩相平俾及時減洩事屬可行然土壩過水不若用石足資鞏固等語商之督臣高斌據云洪湖之水宜多蓄禦黃不宜多洩

致清水受虧開放天然壩固為高寶諸湖之患若滾壩出水五尺以上勢雖稍緩其為患亦屬相等議將天然壩改為石滾壩比南滾壩高一尺乃不得已用以減異漲但於應蓄之水尚無虧損今於三壩之外又令多洩似未相宜且土壩雖屬堅實過水不免冲刷等語至開濬鹽河場河以暢通江通海之路並高堰二堤停其修築之處意見俱屬相同

以上三條如屬可行其中河道應濬寬深開壩應建高下各尺寸並蓄洩啟閉多寡遲速先後各機宜均關緊要應令河臣詳加相度辦理有應立定程式者更須斟酌適宜以便遵守至運鹽串場二河商力疏浚商人祇期船行無阻兼恐築壩開挑有誤掣運多係撈淺是以不能一律深通雖有河員兼挑每草率從事屯次開挑必須開壩以下

深足五尺作為底水應令河臣遴委幹員監受委辦所需銀兩可否即於鹽運道庫內支用令商人分年補還應令於估計後會同鹽臣查辦仍每年飭商實力疏浚不得少有淤淺再天然壩一帶磚石各工並二堤土工原估需銀三十五萬餘兩如議停止應將此項即撥為下河批浚之費其有餘不足之處應聽河臣分別估計造冊報部為此謹奏

查勘水利工程疏

乾隆九年

劉於義

協辦大學士吏部尚書劉於義謹奏為查勘水利初

次應舉各工仰祈 聖鑒事

諭旨查

辦直屬水利事宜於九月十二日會集蘆溝橋公同定議先從宛平良涿新雄由文壩等屬淀河一帶至天津再歷保定正定二府共三十餘州縣逐加履勘所有各屬舊有

淀泊河渠與擬開泉渠河道並堤埝涵洞橋閘等項有關
民間利病無碍墳塋沃產應行疏濬開拓收蓄營治之處
悉與司道守令暨地方老民熟籌確訪審水性之強弱地
勢之順逆民生之好惡權以利害之輕重定措施之次第
果於民生有益不敢以費繁事創而議停其或成效難臻
不敢以費少事輕而率舉除地方去水稍遠令民人掘井
開塘以資灌溉之處現在飭令各府州覆加確議其河淀
工段撥用稅夫及各境內疏消積水溝道例用民力足可
辦理者無庸備列與現今勘過地方尚有遺漏工程以及
奏助各工臨時尚需籌酌合宜戶等分別應奏咨陸續補
辦所有現在應辦各工謹分為十二條並繪圖貼說酌定
規條恭呈 聖鑒

一宛平良鄉涿州境內之牝牛正支各河宜疏濬以消滬

水也查宛平縣蘆溝橋南之北岡窪及趙新店之啞叭河並受西山一帶滙水橫穿九道由董公巷南會趨通濟橋下歸良鄉縣之廣陽河良房二邑之雅河及良邑東北之順水河溝黃管屯溝諸水俱入焉又良邑之茨尾河受本境西北新莊佛耳門滙水及房邑之懷坨新莊等溝諸水俱入焉二河會三岔口入牝牛正河長四十一里至涿州之佟村歸入拒馬河又三岔口北石羊村東有牝牛支河一道長三十餘里至涿州之呂村歸入拒馬河各河俱淺狹淤阻四州縣滙水不能導送歸於拒馬大水之年各屬田畝多被淹浸並漫溢於宛良南北大道每致行旅阻艱今應將良邑上游宛房境內各河溝除照舊例勸用民力疏通歸入廣陽茨尾二河外其宛邑之北岡窪趙新店及房良二邑之順水河溝雅河良邑之管屯溝廣陽茨尾二

河並良涿之牝牛正支河均應動帑挑浚深通以資宣洩其通濟橋舊有石底高於河底三尺橋空低矮有碍水道應掘去舊底將橋拆造起高再啞叭河漚水稍多即穿漫趙新店大道歸通濟橋應於趙新店之南地勢窪下處添建石橋一座以通往來此處大道與董公巷大道俱應即將挑河之土就便一律墊高通計挑河建橋共約需銀八千零二十餘兩如此則四州縣之水有所歸宿可免漫溢淹浸之患且河既深通水常注蓄而牝牛河身內亦間有通泉之處如經歷冬春不致乾涸則通河有不竭之流兩岸民田亦可漸冀有灌溉之裨益矣

一新城雄縣境內之白溝河宜開濬支流以免漫溢也查白溝河為拒馬之下流繞受京西諸水至雄縣大灣口入柴伙淀自新城十里鋪起至雄縣北關外止數十餘里地

勢窪下夏秋水漲往往漫溢出漕田未道路俱遭淹沒查十里鋪支路一道長四里又十三鋪支路一道長十三里皆以分減漲勢但查白溝漲發頃刻丈餘正河寬百丈數十丈而二支河僅寬三五丈不遠仍復歸入正河且自十九堡折向西南勢非徑直實不足以資分洩應將二河開挖寬深又查十三里鋪高橋之南舊有蘆僧河一道自白溝東岸橫穿大道經蘆僧村東南至雄縣之孫家嘴入神機營淀計長六十五里上口四十里淤為平陸只十五里之外涇達村以下尚有河形應將此河開通分減白溝河漲汎直達西淀甚為得力但水下高橋不得減洩其自十九堡支河南溢之水已將直南一帶民田淹沒而沿河西北岸溢出之水又將新城縣南大道之東一帶民田淹沒猶非釜底抽薪之法今應於十九堡支河五里之下馮家

營起立南河一道長十五里至涑遠村接入蘆僧河於其歧派始至即已分疏暢注並以挑河之土於兩岸堅築子埝非惟河不外溢其十九堡東南一帶滙水亦有所歸宿數十村之民田積患可除再自十里鋪起於河北岸東轉北至新橋窰計長二十五里應築土埝一道水不西北溢而民田不憂巨浸矣向來新城南關大道地窪濱河每遇有河漫雨霖行路為阻雖經收墊而河水為患仍屬無益今河既經理大道亦應修墊自南關起至高橋止築壘道十五里餘其十里鋪南北二支河及高橋新聞支河上口東西穿過大道應建造木橋三座再查白溝河下游至雄縣境內東岸有王克橋支河長三十里下通神機營淀西岸有西槐支河長十三里餘下通西淀皆以分洩漲漫用除雄縣南關之險二河淺窄並應展寬深將河頭改

批迎溜以免填淤二河通流蓄水則兩岸民田亦可引用
通計挖河築埝疊道建橋共約需銀五萬三百八十餘兩
再新城縣西斗門紫泉二河藉消滙水以入白溝均有淤
澱應勸用民力疏通可以備蓄洩亦可以資灌溉也

一趙北口以東淀內各支河宜分別開濬以資暢達也淀
池廣袤數百里為歸水之所滙歸而淀必有河以為水道
河又必有支流以暢疏消但支流之河身多係淺狹易致
填淤今詳查分疏要道急應挑浚者如藥王行宮前引河
一道因西淀諸龍諸水畢趨趙北口橋下束注柴伙淀淀
當白溝之衝每遇漲發挾帶泥沙阻截上游諸水倒漾而
西為患近淀各村乾隆二年間在雄縣境內專開藥王行
宮前引河以行西淀之水不與白溝爭路今已間段淤塞
內除兩岸淤土應照旱方泥濘方分別佔挑其水中撈泥

各工可用秋夫疏浚無庸另估工價又保定縣之長青口河為東淀咽喉因約束太緊傳送多阻南岸舊有灘柳河毛兒灣並民人自開村北河溝皆以分洩張青口漲勢臣等細加勘度灘柳等河分水有限村北河溝不能大有開拓應於張青口之北另開支河一道長八里許均寬五丈深六七尺不等灘柳河長四里毛兒灣下口淤處長三里再展寬疏深有此南北支河溝道則張青要津足資分洩矣又玉帶河之支流為中亭河自下河門上口起至三台山村止長二十九里與玉帶南北相對約五里許本不甚深每遇汛發則二河合而為一今自上口又復淤塞二十里愈無以為分洩之路附近村莊每被淹浸急應挑浚將窄處展寬寬處於河底抽挑子河均深七尺以資暢達其西北之六即堤長十里餘防淀水北浸為霸州新城田廬

保障年久卑薄殘缺應行幫築高厚又玉帶以東會同河之支流有張家嘴河長十八里自河口至王家疍疸七里許河面僅寬一二丈深一二丈應行挑展寬深分減沿途水勢可免台頭上馬頭一帶千里長堤之險又台山趙家房兩河之中有古運糧河長四里今河口淤斷三百餘丈應行挑通既以分減兩河水勢且兩岸引灌文霸民田多頃臨河園地並成沃壤矣再台山河趙家房河木橋各一座應改置活板以通舟楫篙槳所施乃無形之疏濬於河通商船俱有利益也以上挑河修堤改建橋座共約需銀一萬一千七百餘兩

一束淀河道宜開通徑直以暢尾閘也查束淀為衆水所匯歸自台頭以下七十里至楊芬港入大清河由楊家河青光並鳳河下口以入於西沽而台頭河口受于牙濁水

壅淤歲需挑浚以行

陵潯漕艘河身既因淤益狹河

流復迂曲不順旁浚各村每有水患今查有勝芳舊河一道上承台山趙家房二河之委徑平張策城之南入楊芬港長四十里較現在台頭達楊芬港之路近三十里東北直注形勢徑捷故土人名為照直河今河身湮塞二十四里餘應行開挑使水暢下竇於東淀全局大有裨益其下楊家河自莊西至下河頭長三里許應展寬挑深又自莊東北至中河頭應裁灣取直三里許以順其勢又楊家河分支之頭道河有淤斷處應開挑四里許接入楊家河再於下游青光之西至蛤蜊河口約長四十里並開拓寬深歸入大清河皆可順流無滯而宣洩亦速矣再勝芬河既已開通則為達津之要道帆檣絡繹應將勝芬村東之第三橋改建活板以便舟楫往來通計挑河改橋共約需銀

二萬八千九百二十餘兩

一子牙河濁流穿淀宜另疏出水口門並築長堤分別清
渾也查子牙上游為滹沱河發源山西代州之秦戲山徑
直隸衡水縣合滄陽河北注大城縣王家口入淀汎水漲
發湍急難禦有東岸靜海屬閭溜二莊新開子河分引渾
水從牛欄河經老君泊歸獨流大坑去王家口河約及二
十里每年清渾並漲則平鋪倒漾迤南數十百村莊悉遭
淹浸及至汎退停散漫淤塞東西兩淀清河傳送之路日
就阻截深為畿南數十州縣水利民生隱患臣等詳加相
度請於王家口北莊兒頭起堵截子牙下流另於現已淤
淺之陳家泊等處展開河身一道改溜東行合閭溜二莊
支河散行北注之水由第三鋪第六鋪當城金里河楊柳
青後出西沽紅橋歸北運河入海計長九十一里餘約需

銀三萬五千六百八十餘兩該處靠南一面係南運河高岸足資攔束應於靠北自莊兒頭西一里起就地勢高阜處議築埝一道直接西沽南壺道長八十五里並建擒築壩等項約需銀十萬六千九百七十餘兩自新堤以至運河西岸橫寬十餘里至四五里不等不虞泛溢河身按照地勢由淺而深建筑東下不致淤墊堤形兩面坦坡設員典守議添岱船祇夫歲取挖淤之土堆貯土牛加高培厚堤根多栽葦草抵禦風浪不虞坍塌惟河身中段自第三舖至金里河三十餘里逼近淀心窪處常年三四月間即得乾涸然旱方泥濘方不過一二尺以下仍多水中撈泥方價未免繁費應請准照部頒天津道成規則例分別估辦自此清渾兩河永不相混堤土即為疊道由天津至保府車馬可通正順深冀各屬鹽糧重載均有綽路永免從

河風波之阻均於地方大有裨益

一附近永定南北之舊減河宜並疏歸鳳河以消滬水也
查永定北岸自固安十里鋪至葛漁城北舊有減河一道
長一百零三里宣洩京南一帶滬水並胡林求賢二壩減
下之水又自葛漁城至蕭家莊北埵外小河一道長四十
七里接連減河歸入鳳河現在二河淺塞均應展拓寬深
小河逼近埵根應向北開挖所挑之土即加培於堤埵之
上又南岸霸州牛眼村至馬家鋪土埵自馬家鋪至龍尾
坦坡埵共長五十里其下舊有減河一道分洩永壩一帶
滬水並清涼寺仙務二壩減下之水今間段淤塞至龍尾
以下東無去路查舊河除現在寬深無庸開挑之各段外
總計淤塞應挑共約長二十七里餘再自龍尾以下之鳳
河十一里許應一併開挖成河以鳳河為出路俾數十里

減水有所歸宿即將舊河所挑之土加培舊埝將新河所挑之土沿海堆積南岸以障蔽東淀南北兩河既均歸鳳河而永定河入沙紫淀之水全恃鳳河為下口所有鳳河間段淺窄之處總計長十五里應行開挑一律深通則宛平固安霸州永清東安武清各縣澗水與永定下游俱藉鳳河轉驅入大清河而全無阻閼矣再查金門閘長安城壩下引河東股自畢家莊歸津水窪長四十九里西股自金門閘石壩至張貴莊歸中亭河長一百三十里均應疏浚以消雨澤及壩下分減之水通計挑河築埝共約需銀五萬七千九百三十餘兩

一塌河淀尾閘淤塞宜急加疏浚以利宣洩也查北運河筐兒港減河上游在武清縣境內口門六十丈以天津縣屬之塌河淀為過水之區由陳家口賈家沽道兩引河歸

海厯因潮汐內灌泥沙淤阻每遇夏秋漲發減河來水俱屯積於塌波周圍六七十里民人不得安業其減河旁流泛溢北運河並西岸之丁直沽至桃花寺地畝廬舍亦遭淹浸本年減河口門過水八九尺地方官竭力疏導至今未能涸盡應將陳家溝賈家沽道二河俱應開挖寬深丁直沽至桃花口議築壘道以資攔禦統俟來歲春融之日趕辦完竣無誤春耕統計挑河築道共約需銀一萬九千九百二十餘兩臣等細查兩處出水引河原寬各十餘丈然以消上口六十丈之水仍有不敷又浚水東西四十餘里兩引河均在西南不能全浚應於偏東另尋水道引流歸海方能速涸但東南一帶係寧河縣境沮洳一片現今難以疏探臣等再三籌畫須俟來年徧厯沿淀各屬通盤勘定另行續辦

一唐河宜由唐完等縣之舊有河渠引歸保定之府河也
查唐河發源山西之靈邱縣至直隸唐縣之雹水村舊有
廣利渠一道引水灌田長七十里年久湮廢康熙二十四
年居民開通近渠口十餘里乾隆八九兩年勸民疏浚續
開八里雹水等十餘村田畝現資灌溉二十餘里之下渠
形斷續東接完縣之祁河曲逆河蒲河長八十餘里均可
相通曲逆蒲河下接滿城縣之方順橋河分南北二支南
為金線河長九十餘里至保定城東二十餘里梁河橋西
入於府河北為白草溝河長四十餘里至保定城西南隅
入於府河府河東六十餘里為安州之依城河由新安縣
城南歸入西淀計自唐河口至保定府河共一百七十餘
里自府河至新城南共八十餘里臣等自白草溝蒲祈
曲逆等河並廣利舊渠直至唐河口親行踏勘地勢自西

而東極為順捷河渠舊跡相承而下施工亦易唐河水道就舊渠口引入形勢甚便實可通連開挑新河一道應將唐邑境內舊渠開寬三丈完邑境內之祈河裁灣取直開寬自三丈至五丈曲逆一河淺窄迴環不可行水亦不能取直查曲逆之北子城橋有乾溝一道長三里許應改由此處開挑下接蒲河二里許歸入白草溝河均開寬五丈其金線河用備分減水勢應開寬一丈深與白草河相等保定府河安州依城河直至新安城南均就舊河身內開寬自五丈至七八丈不等保定之護城河亦應展寬三丈以通水道其上下游河身深淺應酌勘地勢自三四尺至七八尺不等再唐河渠口舊有石閘今已廢圯應擇新河堤岸高處另建大石閘一座遇水漲盛即下板鍵開俾全勢悉由正河南下不入新河以免疎虞又金線白草二河

口應各建石閘一座水少則閉金線河閘令水全歸府城
河下水大則閉白草河閘令水由金線河歸府河下游平
時則酌量分減以資金線河兩岸民田灌溉之用又府河
自城南至安州寨頭村長七十八里內應建石閘五座蓋
此數里內地勢建瓴水難停蓄舊有上下二閘卑薄殘缺
今應拆去於下閘地方另建一閘並擇於清苑境內小聖
廟東建閘一座東安北建閘一座安州境善馬廟建閘一
座又寨頭廟建閘一座層層閘鎖定章程以時啟閉則水
可常盈不缺將來唐河水入新河兼滿城一畝難距等泉
匯入府河如果一律深通水常足用則唐完滿城清苑安
州新安各境內於河兩岸建立涵洞閘挖溝澮支分派引
灌溉田土為利甚溥蓋廣利渠民間舊享其利今擴充成
河則所達更遠故民情皆甚踴躍且保定府河寬深直通

東西淀河舟楫通行商貨業集亦於地方大有裨益至於應建橋梁涵洞等項統俟河成後再為酌量地勢水勢次第辦理統計河間各工約需銀七萬一千二百餘兩

一河淀流長勢便者宜渠開通引以沃民田也查天津城南一帶地廣數十里東界海河地勢低下乾隆五年曾於疏通積水案內在城東南四十里之白塘口村西開挑引河一道長二十六里由三合莊至藥王廟西通坡水窪又南十里許於鹹水沽起西至秋漠淀開挑引河一道長二十七里俱以宣洩滙水數年來漸次淤淺且民田荒蕪旱澇無恃上年十二月內臣高斌於恭請 聖訓事案內

奏請自天津縣護城河起由八里臺西至佟家樓開渠一道接連賀家口舊有引河藉城東南角之海河開以通潮汐附近居民田畝水旱俱得播種計用過銀一千二百八

十七兩零今復遂加履勘縣南地形遶濶新河河渠尚未
能盡地利應於八里臺新開渠南由凌家口西南至陳家
莊再開一渠通至坡水窪又自凌家口東南由梨園頭東
至大任家莊復西南至樂王廟開渠一道入白塘口舊引
河亦通至坡水窪又自大任家莊北由柳店窪至何家園
開渠一道至李七莊徑凌家口亦通至坡水窪約共周長
一百餘里再將白塘口鹹水沽賀家口舊引河三道於淤
淺處一律疏通賀家口何家園地方各建磚閘一座以通
潮汐以司啟閉並於各村莊穿道開河處建大小木橋六
座則津城南鄉有數河環繞灌溉又有大淀柳店坡水等
窪以為停蓄荒蕪之地俱可耕植旱澇均得有備矣又新
安縣城南淀頭村坐落堤上旁環五村有瘠地二百餘頃
堤內有內水河一道以蓄泄水堤外通白洋淀應於淀頭

村南建閘一座閘內開正支渠二千餘丈引水灌溉餘水即以内水河為歸宿瘠地均可播種又段村東西共地百頃中界內水河此處地形東高西下村西舊有石閘以洩安州滙水應於村東另建一閘閘內挑正支渠六百三十餘丈亦引白洋水灌地均以內水河為歸宿並於村西舊閘內挑渠七百四十餘丈抵安州界以洩滙水兼可左右引灌又安州城南同口村東之馬棚淀坐落堤內有地三百餘頃最為瘠薄堤外有王家河通白洋淀應於河口堤岸建閘閘內挑縱橫渠一千一百餘丈並於同口村北疏渠一道長十里許俱可引白洋河淀水以灌兩處田畝又霸州中亭河北岸有拷棧園漁廠村高各莊三台山四處地勢平行瘠薄上年曾開堤放水今春旱暵尚有所獲應於堤內各建涵洞一座引水內灌四村田畝均收其利又

雄縣之大殷村南北東三面有堤以禦白溝河及西淀漲水堤內田畝數百頃潦即無從宣洩旱亦不能引灌今相度形勢應於南面王家房村設立涵洞一座以為引灌宣洩之徑竇其中溝渠村民情願自為挑挖以上開渠並建造橋閘涵洞各工共約需銀二萬九千九百餘兩

一正定縣各泉宜開河引渠以成自然之利也查正定縣西有大鳴泉小鳴泉楊家泉石灣泉以及無名各泉甚多現資灌溉稻田百有餘頃泉之下流總俱匯於城西之西柏棠村向由柏棠入護城河潞河二十里蓮藕魚蝦之利頗饒賦稱上則後城河堙塞水不能蓄轉以泛溢因仍由城西塔元莊歸入潞河亦經導至城東響閘然不遠仍由大林濟瀉入潞河亦不久復於西柏棠建閘攔水悉由塔元莊歸潞矣棄有用之水助潞河之勢甚為非計臣

等細加踏勘應於西柏棠起挑河八里餘引水至護城河
城河四面俱挑浚寬深使大鳴諸泉之水灌注存蓄以復
舊規城南響閘稍北地名鴨子嘴令城河於此出水東南
由小林濟至大林濟復東北折入棠城縣之固營村南長
十五里又東南歷黃莊小屯堤至枳照村長十八里俱開
成河道其中因仍舊溝之處為多再鴨子嘴東北二里許
有南北道溝長十五里經朱河村達於固營應將南道溝
挑拓一律寬深北道溝就現溝身加以疏浚即可足用其
鴨子嘴東北接道溝以河渠橋閘共約需銀一萬七千九
百三十餘兩

一舊有營田渠閘宜酌加修復以利民用也查新安縣大
澍淀地方有地千頃從前築圍營田四面環穿大渠內外
二道支渠四十道渠南建有西關閘引府河之水北注渠

乃又於東北開挖新河一道計長三十里自容城黑龍江起引瀑河之水順堤而東由四工閘南注渠內夏秋之間過水有餘則於新河之東名南河開洩入燒車淀其黑龍江亦建有石閘以司啟閉雍正四五等年曾經營成拙田三百餘頃嗣後府河水常不足瀑河又每為上游之安肅谷城截用應聽從民便改種旱田歷年既久渠閘遂日漸堙廢水道不通旱潦均無所恃且等遂加履勘西開閘引府河之水並於燒車等淀相通洩水長時亦可由閘引入灌漑大澈淀內之地但閘座方位安置未協細加相度應改建西北隅以順城河上游之勢其瀑河一道應將安容新三縣境內淺窄之處一律疏浚深通飭令各該縣立定章程按期用水並將黑龍口以下之新河阻塞處挑挖使水勢流通暢達由四工閘入渠其外圍大渠計長六十六

百三十餘丈應先將此渠展挖如式先籌引用府河瀑河之水以資灌溉俟來年春夏試看河淀水勢如果應時足用再將內渠一併動項挑其支渠勸用民力普行挑濬以復舊規水枯旱田聽民耕種自便各閘壩蓄水機宜另行詳勘酌籌妥辦以垂永久又將南堤頭地方亦係向日營田舊址堤下府河之水由太平閘引入中渠自閘口至劉家坟計長十丈渠形宛然應將挑挖深通勸民自開支河引水灌田可三百餘頃又任縣門城村坐落十里長堤南臨白洋淀北有月堤一道臨淀建有磚閘引水至月堤內又於月堤建木閘三座三渠導水至閘外支分九道灌地九十餘頃其地南高北下安州容城北來滙水過多則近渠各地被淹舊築有土埝一道以禦滙水涵洞五座使渠水可以北尾滙水可以南洩今渠埝涵洞俱淤阻殘缺

應將各渠俱為疏通合共長二千八百六十餘丈舊埵涵
洞均為修整庶民田漸得灌溉之利又文安縣之蒼耳淀
舊築營田日久堙廢應於園內南北挑渠一道長五里餘
亦建南北涵洞二座以資宣洩灌注又雄縣之留通李郎
二村舊設涵洞各一座引水灌地營田今查涵洞過高應
為落低三尺又霸州十間房園埵內共地五十餘頃建有
水閘一座引水灌溉內稻地十餘頃雜糧地二十餘頃葦
稿地八頃餘現在民種官分租利每年額解通倉稻米並
雜糧實價銀數百兩今相度情形園內溝渠尚未周備應
於可種稻田之處四面再比舊溝環曲共長六百餘丈亦
應開挑俾水泉環注為附近東關一帶民田引灌之利其
西北柏棠園座應改建大石閘一座鴨子嘴建石閘一座
以司啟閉再各泉河俱總滙固營以南達枳照村以下歸

入庫沱為下口應建石閘一座水小則鍵閉以資灌溉水大則啟放以備宣洩舊由塔元莊並大林濟洩水之河口俱行築壩堵塞如此則各泉河往復交注於民田千頃之田永以支渠均可旁引四達應聽自行挑挖營田灌地隨其所用又正定城東北隅舊有旺泉今已淤塞其下溝道尚傳旺泉之名據正定縣知縣嚴裕銓訪查挖掘已得泉眼數處水流頗盛如及春旺達則自東西上寨等村因舊有溝道開通亦東抵固營與大鳴等泉周互灌溉其利甚溥再查城河四門應建木橋四座與各河道有界村莊孔道者共應建木橋七座統計開建挑小溝以便高下節次引灌並開蓄水渠一道即以挑渠之土幫築東堤以資捍衛更有裨益通計挑渠築堤開座涵洞共約需銀四十九百六百餘兩

一營田應順民情借給工本以廣水利也查正定府屬之井陘縣有綿蔓河一道長流不竭冬亦不冰由平山縣境歸入洹沱河該二縣民人於各河灘地內築壩開渠引用綿蔓洹沱等水營治稻田井邑已營成者三十九頃平邑已營成者三百三十七頃現在自備工本營治將成者二十餘頃茲據井邑民人呈請於縣北之段莊威州村西灘地內築壩引用綿蔓河水可以營治稻田三十餘頃又平邑民人呈請於縣之南莊等村東黃泥灘龍王堂三處均築壩引用洹沱河水南莊等村可以營田三十五頃東黃泥灘可營田六頃龍王堂可營田十一頃據井陘縣詳請借給民人工本銀三千七百七十二兩一錢二分平山縣詳請借給民人工本銀五千五十九兩九錢六分俱按照十年完繳營成之後照例陞科其渠壩等工聽民自行興

修等因臣等因親赴各營田處所查勘均實係應行修治可望成熟之田所請工本銀共八千八百三十二兩零應照數借給俟請領部項到日發縣給領臣等因查正定各屬如正定縣之西漢等二十七村莊引大小鳴泉楊家泉韓泉諸水營成稻田共計一百一十餘頃新樂縣屬之中同等七村引用泉水營田共十三頃二十餘畝行唐縣屬之和合等五村引用蓮花泉水營田共三十三頃五十餘畝靈壽縣屬之文武頭等四村引用磁河之水營田共四頃九十餘畝阜平縣屬之王快西河灘贊皇縣之上西門等處各引縣境河水營田亦有些餘再定州境內西板唐家莊等處引用白龍黑龍二泉水清河諸水營田共一百六十餘頃以上正定府屬並定州八州縣通計成熟之稻田共六百六十餘頃而接連營田地面尚可開拓經營者

如平邑之間興舊興二村南灘地五十餘頃已營成二十餘頃因村民爭用水口未經立定章程現飭該府查議或該村民人自備工本或官為借給再行續辦以廣利澤以上應辦各工另列料估清揭共約估需銀四十七萬三千四百餘兩請將直賑項內先撥銀五十萬兩到直以便預為料理俟春融後次第興工再行另造各項清冊題估請銷伏乞 皇上睿鑒

皇清奏議卷四十